

Paulo Ena Marere ROMA Haukia Herekiaia

Puka Aona Irerena 'Abina

Paulo ehore puka neiana ererena pokina ena nuatae hanona keao a'ikakauma haukia to'ukia baika Roma aiara apa'uanai haukia keihanakia. Ena nuatae hanona keao kipokia katemiaho 'apua ba keao Speini (15.23, 24). Puka neiana aonai Paulo ehore Keriso pouna namona ehina pou haraina, mai weiakia Iesu murinai ti'au haukia ekia mauri aea katehoma.

Kori'uainai hanona banamo 'abina a'ikakauma haukia to'ukia Romai temiaho herekiaia ehinana. Epuā puka 'abina anina tohana na ehina harai aihona, “pou namona aonai bero Tirama herenai emai hauna ewaira tina, kaha'i ramana a'ikakaumai keaomo puana.” (1.17) Haeamona Paulo e'abi, maearima weiakia Iuda haukia 'ao rama haeai haukia ikoikiaia hanona ki'a haukia. Weiana Tirama ehore ia eaoko'oai ki'anakia, eapari muenakia Iesu Keriso katea'ikakaumana haukia hanona Tirama kehore ia kebamaurinakia.

Puka iro'ana 5–8 aonai Paulo ehore Tirama ena rauhūbu anina mai Auba Robe a'ikakauma haukia ekia mauri aonai hauna robakia eahunakia. Iro'ana 9–11 hanona Paulo kipona ena puma apa'uana ha robana eahuna, weiana Iuda haukia weiakia Tirama etina'anakia ia ena maearimai kateao haukia bo'ona Iesu teka-muri aina. Haeamona rama haeai haukia hanona temai Iesu i'abana haukiaia teao, iamo

Iuda haukia hanona aha'i. 'A Paulo ena a'ikakauma hanona muriai Iuda haukia katemai Iesu ena maearimai kateao. Puka neiana a'enai hanona Paulo ehore hoahoa mai babai weiana a'ikakauma haukia kateka'ai haukia robakia eahuna.

Puka Paipana Apa'uakia

- a. Roba ahu mai 'abi'abi apa'uana. (1.1-17)
- b. Maearima bamauri katea'ina hanona taba apa'uana. (1.18–3.20)
- c. Tirama ena bamauri taearana. (3.21–4.25)
- d. Mauri mahamahana Keriso aonai. (5.1–8.39)
- e. Isaraela haukia Tirama ena raona aonai. (9.1–11.36)
- f. A'ikakauma maurina. (12.1–15.13)
- g. 'Abi orekia mai banamo 'abikia. (15.14–16.27)

Paulo Ena Iuhubeau Akana Pouna Ehinana.

¹ Au Paulo e'u marere neiana. Iesu Keriso ena ta'ara ia'ina hau'u, ena iuhubeau haunai kaeao paunai Tirama etina'ana'u eaparina'u ena pou namona kairoro aina.

² Pou namona neiana hanona Tirama ehore aba wa'i baha e'abi'uai aina ena mahabanai haukia pinakiai tehinana Puka Robena aonai tererena,

³ ia Nahuna pouna, eka Obiapaka weiana Iesu Keriso, hauaniai hanona Davida nininai erama,

⁴ ia aubana robenai hanona 'ariai ebamikirina raninai ebatohana mai hiabuna ia hanona Tirama Nahuna.

⁵ Iesu Keriso paunai mai ia atanai baraibarai apa'uana abomo iuhubeau hoana aba ta'ina, weiana rama haeai haukia baiatakiai maearima ikoikiai kataparinakia a'ikakaumai aia kateka'ai.

⁶ Wai abomimo weia Iesu Keriso 'eunai Tirama ehore eaparinakia haukia baiatakiai.

⁷ Roma ai tomiaho Tirama eraona'au ainimi eaparinimi ena maearimai ebaonimi haumi ikoimiai, Hamaka Tirama mai Obiapaka Iesu Keriso herekiai aoko'o hoana abomo baibua katoa'ina.

Paulo Enuatae Keao Roma.

⁸ E'u 'abi kori 'uaina neiana: Iesu Keriso atanai e'u Tirama nabanamona wai ikoimiai paumiai, pokina wai emi a'ikakauma pouna hanopaka ikoinai aba teona.

⁹ Tirama weiana Nahuna pouna namona nairoro aina aonai ta'arana na'i mai ao'u ikoinai hauna e'jobina e'u bahuba'ari ai au wai naraonanimi,

¹⁰ rani ikoinai e'u bahuba'ari ai Tirama nanoina ena nuataeai taeara'u pekaikauna rani ha pawahi paihanimi.

¹¹ Pokina au nanuatae ki'a baha kaihanimi, auba ena beruberu kabaibeni katotabura.

¹² Weiana hanona au mai wai kipoka kahabarainaka, eka a'ikakaumai ha ha kahataburanaka.

¹³ Uaho'aba'u e, au nanuatae wai kato'jobina, rani bo'ona anuatae kawahi heremi, buabua katabu ahi ihobona rama haeai haukia baika ekia mauri tebaibeni aihanakia 'abana, ia taba baika tehore tekaibuna'u emaimo bariu.

¹⁴ Au hanona pou namona ihinanai 'ara kahore maearima ikoikiai herekiai, Helene haukia mai ea aha'i haukia abomo ao 'abaea haukia mai aotipa haukia herekiai.

15 Weiana buonai au nanuatae ki'a baha wai Roma ai tomiaho haumi wairamiai abomo pou namona kairoro aina.

16 Au pou namona a'i nahaumaea aina, pokina ia hanona Tirama ena hiabu, a'ikakauma haukia ikoikiai kebamaurinakia kori'uaina hanona luda haukia, muriai hanona rama haeai haukia.

17 Pokina pou namona aonai bero Tirama herenai emai hauna ewaira tina, kaha'i ramana a'ikakaumai keaomo puana, puka robenai tererena 'abana, "Aka bero hauna hanona a'ikakaumai kemaui."

Tirama Ena Opuere Maearima Herekiai.

18 Maearima ekia kamuri mai babai ki'a paukiai Tirama ena opuere kupai emai ewaira tina, weiakia ekia babai ki'ai 'abi tohana tihao parena haukia herekiai.

19 Tirama i'jobina hanona aba emahanai harai herekiai, pokina Tirama ehore ebaihanakia.

20 Hanopaka erama popounai emaimo bariu Tirama 'eunai a'i nahaihanakia tabakia ena hiabu banai banai mai ena auba maurina hanona ia ebabai tabakia aokiai tewaira tina harai teihanakia te'io binakia, weiana paunai maearima kebuniai hanona taearana aha'i.

21 Tirama te'io binamo a'i tea'i taeana abomo a'i tebanamona ia hanona Tirama, ia ekia ao 'abaea mai ekia ao po'oai wapura ehore aokia ekaiabuna.

22 Ia kipokia teraonana teatipa, iamo po'o haukiai teao.

23 Miaho banai banai Tiramana ikuti aina tehabona, ia maearima aubaubakia a'i katemiaho banai banai haukia, roborobo, mahi,

mai tikara tabakia haukia, aubaubakia imakiai tebabai tabakia tekuti ainakia.

Maearima Aka Ki'a Obokia Haeai Haeai Tibabai.

²⁴ Weiana buonai Tirama ehore aokiai ki'a tenuatae ainakia 'ekana'i ehabonakia, weiana kipokia ekia babai ki'a obokia parikia akakia katebabai ha ha herekia.

²⁵ Tirama ena 'abi tohana hanona ia tehore bai'oi tabana'i tebaona, iamo 'ekana'i hanona taba ebarama tabakia tekuti ainakia ta'arakia tea'i. Iamo ebabainakia hauna Ia ikupaiana kahabana-mona keaomo banai banai. Amen.

²⁶ Tirama ehore ehabonakia teao ekia babai ki'a obokia aonai. Ekia babi'e tehore babi'e tenabau ainakia weiana ua a'i pehoma hauna tebabaina.

²⁷ Taeara ihobonai hau abomo babi'e kipokia hawainibena tehabona, ia hau tehore hau tenuatae ai ki'anakia. Hau kipokia 'abakia herekiai babai ki'a obokia tebabai. Weiana hanona ekia babai ki'a 'arana kipokia pumana tehoa aina.

²⁸ Ia tehore aokiai Tirama iraona 'ininai a'i tenuatae aina, weiana Tirama ehore ekia ao 'abaeai ehabonakia, a'i patebabai akakia tebabai.

²⁹ Aka ki'a obokia haeai haeai aokia tebonu, babai ki'a obokia, uhore mai raona ki'a obokia, wamuru, ahuahu, 'au, bai'oi mai ao bahaiara akakiai tebonu. Teuahiuaahi,

³⁰ mai 'abi'abia'i ha ha atakia tia'i ki'anakia, Tirama ti'oatana, tiaiahu 'abaea, tiapa, abomo tibaroe, raona ki'a obokia 'eka baikai tiraonanakia katebabai. Hamakia mai hinakia aiakia a'i tio'o.

³¹ Ia hanona ekia raonaraona aha'i, ekia 'abi'uai a'i tibatohanakia, mai maearima herekiai namo 'ao aoko'o a'i tiba ihanakia.

³² Tirama ena rauhubu aba te'iobina maearima 'eka ua homanai temiaho haukia hanona kate'ari. Ia ki'a weiakia tibabai to'o baihanakia abomo maearima baikā tibabai raninai tiaonamo ainakia.

2

Tirama Ena Bakai Berona.

¹ Weiana buonai 'abiai hau ha behoai nuhorotina haumu, emu bero 'abina ha aha'i. Oi 'abiai hau ha behoai nuhorotina hanona kipomu puma nubeni'o. Pokina ia behoai ohorotina akana ihobonai oi abomo nubabaina.

² Aika ha'iobina Tirama hanona mai ena bero ua tibabai aiho haukia behoai kehorotinakia.

³ Weiana oi 'abiai hau ha behoai nuhorotina ia akana ihobona nubabaina haumu, oi nuraonana Tirama behoai kehorotini'o 'ekanaī aba koka-pare, u?

⁴ 'Ao aehoma a'i o'iobina Tirama ena namo apa'uana weiana ehore e'uai aini'o raona kabe taearanai ena namo apa'uana, ena baiha hao mai ena bakiro oiha ta'erainakia?

⁵ Ia aomu etubu, emu raona kabe aha'i paunai oi kipomu emu puma nubararona, Tirama ena opuere mai ena bero bakai beraurana kekara'au raninai emu puma weia kewaira tina.

⁶ Tirama kehore maearima ha ha ekia babai ihobohobokiai arakia kebenakia.

⁷ Maearima baikā aka namokiai tibapahihi haukia abomo nuabi mai mariki abomo a'i kepua maurina titabuna haukia hanona Tirama kehore mauri banaibanai kebenakia.

⁸ Ia maearima baikā tiani ki'a mai 'abi tohana tibaoao aina, aka behokia tia'i taeanakia haukia hanona Tirama ena opuere mai ena puma ahakiai kebaririna.

⁹ Aka ki'a obona tibabaina haukia ikoikiai hanona atetua mai haiara katehoaina Iuda haukia mo aha'i rama haeai haukia abokia mo.

¹⁰ Ia aka namona tibabaina haukia ikoikiai hanona Tirama kehore nuabi, mariki mai baibua kebenakia, kori'uaina hanona Iuda haukia, muriai hanona rama haeai haukia.

¹¹ Pokina Tirama hanona maearima ha a'i nitaina.

¹² Mose ena rauhūbu kapenai temiaho haukia tiaka ki'a hanona weianai aka ki'a haiarana katea'ina, 'a rauhūbu aonai temiaho haukia tiaka ki'a hanona rauhūbu kebabakainakia.

¹³ Rauhūbu uruna tio 'abaeana haukia hanona Tirama wairanai bero a'i katea'ina, ia rauhūbu akana tibabaina haukia hanona berokia kehinana.

¹⁴ Rama haeai haukia herekiai Mose ena rauhūbu aha'i, ia aokiai rauhūbu hoana ihobona tebabaina raninai, rauhūbu herekiai aha'i re'a, ia kipokia rauhūbuai teao.

¹⁵ Ia aokiai rauhūbu 'abina tererena hauna ekia hoahoai niwaira tina aokia abomo weiana nibatohana, ekia raonaraona weiana nihore behokia nehinana 'ao berokia nehinana.

¹⁶ Pou namona airoro aina ihobonai, beraurana kekara'au raninai Tirama kehore maearima ekia raona bunikia kebakainakia Iesu Keriso paunai.

Iuda Haukia Teraonana Rauhūbu Kebarainakia.

¹⁷ Ia wai kipomi tu'abi Iuda haumi, rauhūbuai tukori 'ini abomo Tirama tuapaina,

¹⁸ abomo Tirama taba nenuatae aina hauna to'ioibina mai bero nimai 'ekana to'ioibina pokina wai rauhuhu tomarere aina.

¹⁹ Turaonana wai hanona maha'iau haukia ibaka'a haraikia mai wapurai temiaho haukia ekia ea

²⁰ abomo po'o haukia irobekia mai a'i temarere haukia iba'ioibikia haumi, pokina rauhuhu aonai aotipa mai 'abi tohana maikoinai totabu ahinakia.

²¹ 'Abami tuba'ioibinakia ia aehoma wai kipomi a'i tubatohana? Toiroro a'i katebainao, ia wai tubainao?

²² Tu'abi a'i katenabau, ia wai tunabau? Kaiba'uku 'arikia a'i tu'ari, ia wai ro'e* aona tabakia tubainao ainakia?

²³ Wai rauhuhu nemiaho paunai tuapa, ia rauhuhu tukabena hanona Tirama atana tua'i ki'ana.

²⁴ Puka robena aonai e'abi, "Wai Iuda haumi paumiai rama haeai haukia Tirama atana tia'i ki'ana."

²⁵ Rauhuhu koka'ai haraina raninai emu itare hanona namo kebeni'o, ia rauhuhu kokabena raninai oi hanona ihobona itare a'i oa'ina 'abana.

²⁶ Rama haeai hauna ha a'i tetarena ia Tirama ena rauhuhu 'abina keka'ai haraina raninai Tirama kehore itare ea'ina haunai kebaona.

²⁷ Weiana hauaniai a'i etarena ia rauhuhu eka'ai haraina hauna kehore oi Iuda haumu behoai kehorotini'o, pokina rauhuhu tererena hauna heremuai abomo itare oa'ina ia rauhuhu nukabena.

²⁸ Maearima hauaniai ihaihana Iuda hauna ia Iuda hauna tohana aha'i abomo hauaniai itare

* 2:22: (22) marea robe

tea'ina hanona itare tohana aha'i.

²⁹ 'A aona nibamaha mahana hauna ia hanona Iuda hauna tohana, abomo itare hanona aoai kebabaina Auba Robeai, ia rauhubu'ai aha'i. Maearima uahomana hanona banamo Tirama herenai kea'ina, ia maearima herekiai aha'i.

3

Tirama Ikupaiana Keibatoha.

¹ Uahomana raninai Iuda haukia ekia namo hanona taba? Itare ena namo hanona taba?

² Tae'ara bo'okiai. Kori 'uaina hanona Tirama ena 'abi Iuda haukia herekiai ehorotina kate'imana.

³ Weiana baika ekia a'ikakauma peaha'i raninai aehoma? Ekia a'ikakauma aha'i buonai Tirama kipona ena 'abi'u'ai a'i kebatohana, u?

⁴ Ua a'i kehoma. Maearima ikoikiai katebai'oi, ia Tirama ikupaiana keibatoha. Puka robenai tererena ihobona,
 “Emu 'abiai kobatohani'o obero.
 Weiana kateba bakaini'o raninai kotara haonakia.”

Sal 51.4

⁵ 'A aika eka ki'a kehore Tirama ena babai berona kebawaira tinana raninai, taba na kahahoma? Weiana Tirama puma 'ekanai ni-horotinaka hanona nibeho, u? Aha'i. Ua a'i kehoma. (Neiana hanona maearima ekia raonaraona nahinana.)

⁶ Ua homana aha'i. Tirama a'i kebero raninai, hanopaka aea kebabakai aihona?

⁷ Baika te'abi, “Au e'u bai'oi pehore Tirama ena 'abi tohana pebawaira tinana abomo ena nuabi

pebapa'uana raninai, taba buonai au aka ki'a pumana kahoaina ki'a hauna 'abana?"

⁸ Baika ai tekai ahi 'abaeanamai te'abi ai hanona na ta'abi aiho, "Namo ibaramana paunai ki'a akakia kahababai." Ekia bai'oi pumana katehoaina hanona kenamo.

Hau Ha A'i Ebero Ki'a Baha.

⁹ Uahomana raninai taba na kahahoma? Aika Iuda hauka hanona hanamo ba rama haeai haukia? Aha'i 'akina. Pokina Iuda mai rama haeai haukia hanona ki'a aonai nahamiahoh 'abina aba hahinana.

¹⁰ Puka Robenai tererena ihobonai, "Maearima ha a'i ebero ki'a baha Tirama wairanai, tai ha aha'i 'akina.

¹¹ Abomo ao bero hauna ha aha'i, Tirama itabuna hauna ha aha'i.

¹² Ikoikiai aba tekaobo aba ki'a aonai tetoto haeamo aka namo hauna ha aha'i, tai ha aha'i.

Sal 14.1-3

¹³ Ekia 'abi timikia hanona teki'a matoha 'ariahana ikaikau, maeakia bai'oi 'abikia tehinanakia. Pinakia 'abinai hanona 'abakia tibahaiarakia matoha 'erau ekia ba'ari muramurana 'abana.

Sal 5.9

¹⁴ Pinakia hanona ururu mai aomabi 'abikia tebonu.

Sal 10.7

¹⁵ Ia tinoanoa maearima kateba haiaranakia mai kateahu 'arinakia.

¹⁶ 'Eka tabana kateao hanona maearima kateba 'oatanakia

mai kateba atetuanakia.

¹⁷ Abomo baibua taearana hanona a'i te'iohina.

Isa 59.7, 8

¹⁸ Tirama a'i tita'uai 'apuana.”

Sal 36.1

¹⁹ Aika ha'iohina rauhuhu taba ne'uahina hanona weiakia rauhuhu ba'anai temiaho haukia nehina benakia, weianai maearima ekia ba'ame 'abikia aha'i, hanopaka maikoinai Tirama ena bakai aonai katetoto.

²⁰ Tirama wairanai hau ha a'i ebero rauhuhu ika'ai haraina paunai, ba rauhuhu hanona keba 'iohinaka aika ki'a hauka.

Maearima Kea'ikakauma Hauna Berona Katehinana.

²¹ Bariu Tirama maearima bero kebenakia taearana aba ebawaira tinana, rauhuhu aha'i, weiana hanona rauhuhu mai mahabanai haukia tebatohana.

²² Bero Tirama herenai nimai hanona Iesu Keriso tia'ikakaumana haukia ikoikiai katetabu ahina maearima ikoinai herekiai ha a'i ehaei.

²³ Pokina ikoikiai aba teaka ki'a, buonai Tirama ena nuabiai tetara kapu.

²⁴ Iamo Tirama ena aoko'o hoana ebaibeni 'abaea, ikoinai bero tea'ina Keriso Iesu paunai, pokina ia ehore ekawa muenakia.

²⁵ Tirama ehore Iesu euhuna emai hanopakai e'ari baibua hoanai eao, Iesu e'ari eka ki'a paunai hauna kaha'ikakaumana hauka eka ki'a kehina hao. Neiana ebabaina hanona ena bero ebaiha baiha aina. Aona ea'i 'inina, 'uainai maearima teaka ki'a haukia eiha haonakia puma a'i ebenakia.

²⁶ Bariu rani neianai Tirama hoa weiana ebabaina kipona ena bero ebaiha baiha aina, taeara weianai Iesu tia'ikakaumana haukia abomo bero kebenakia.

²⁷ Uahomana raninai taba hauna kahapaina? Ba taeara tabanai? Rauhuhu ika'ainai? Aha'i. Taba ha ai aha'i. Ia a'ikakauma taearanai.

²⁸ 'Abi tohana aika ha'iohina Tirama maearima a'ikakaumai bero nibenakia, ia rauhuhu ika'ainai aha'i.

²⁹ Tirama hanona Iuda haukia mo ikupaiakia ekia Tirama, u? Ia rama haeai haukia ekia Tiramai a'i keao, u? Aha'i. Ia rama haeai haukia abokia mo ekia Tirama.

³⁰ Weiana Tirama hanona hamona itare haukia a'ikakaumai bero kebenakia mai itare aha'i haukia abomo a'ikakauma ihobonai bero kebenakia.

³¹ Ua homana raninai aika hanona a'ikakauma neianai rauhuhu nahaba 'akaumana, u? Aha'i 'akina. Aika hanona rauhuhu nahabakori 'inina.

4

A'ikakauma ai Aberahamo Bero Hauna.

¹ Uahomana raninai taba kaha'uahina 'aba'abaka Aberahamo 'eunai? A'ikakauma hoana hanona aea etabu ahi aihona?

² Aberahamo ena aka paukiai bero haunai peao raninai, taba weiakia paukiai peapa, ia Tirama wairanai aha'i.

³ Puka robena taba na ehoma?
 “Aberahamo hanona
 Tirama ea'ikakaumana paunai
 Tirama ehore ia bero haunai
 ebaona.”

⁴ Aka hauna mai 'arana weiana hanona beruberu tabana aha'i, ia ena hau haiara 'arana.

⁵ Hau ha aka namona a'i nibabaina, ia Tirama nihore ki'a hauna bero nibaibeni Tiramana nia'ikakaumana hauna hanona ena a'ikakauma paunai bero haunai kebaona.

⁶ Maearima aka paunai bero a'i tea'ina ia Tirama herenai bero tea'ina haukia ekia namo 'abina neiana Davida ehinana.

⁷ “Weiakia ekia aka ki'a obokia ehina hao mai ekia ki'a ea'i obo haukia hanona tenamo.

⁸ Obiapaka kehore ekia ki'a a'i ketuabi haukia hanona tenamo.”

Sal 32.1, 2

⁹ Banamo neiana hanona tetarenakia haukia mo katea'ina 'ao a'i tetarenakia haukia abokiamo katea'ina? Aika aba ha'abi, “Aberahamo ena a'ikakauma paunai Tirama ehore berona ehinana.”

¹⁰ Rani tabanai bero haunai ebaona? Itare wairanai 'ao murinai? Tirama Aberahamo ena bero ehina 'uaina ba tetarena.

¹¹ Aberahamo hanona a'i tetare bahana aonai ena a'ikakaumai bero ea'ina, muriai tetarena, weiana hanona a'ikakauma hoana ibatohana. Ua buonai Aberahamo hanona mai ekia a'ikakauma haukia weiakia Tirama bero haukiai ebaonakia haukia ikoikiai hamakia.

¹² Ba tetarenakia haukia abomo hamakia hanona Aberahamo. Ia tetarenakia haukia maikoikiai aha'i, baikha hamaka Aberahamo a'i tetare bahana aonai ea'ikakauma, taearana weiana ihobonai kateka'a haukia hamakia.

Kaha'ikakauma Hanona Tirama Ena 'Abi'uai Kaha'ina.

13 'Abi'uai hanona ebaibeni Aberahamo mai 'aba'abana kipokia hanopaka maikoinai katea'ina ia 'eukia, weiana hanona rauhuhu paunai a'i ebena, ia bero weiana a'ikakaumai nimai hauna paunai ebena.

14 Pokina rauhuhu tia'i taeana haukia 'abi'uai pate'a'ina ia 'eukiai peao raninai a'ikakauma hanona ena namo aha'i, 'abi'uai abomo anina aha'i.

15 Rauhuhu nikabena hanona Tirama ena opuere nibaramana, ia rauhuhu peaha'i raninai beho atetuakia abomo pateaha'i.

16 Weiana buonai 'abi'uai hanona a'ikakaumai nimai baraibarai apa'uana ihobona, Aberahamo 'aba'abana ikoinai katea'ina, rauhuhu tika'ai haraina haukia mo aha'i, ia Aberahamo ea'ikakauma ihobonai tia'ikakauma haukia ikoikiai herekiai. Pokina Aberahamo hanona aika ikoikai hamaka.

17 Puka robenai na terere aihona, "Au oi hanopaka bo'ona hamakiai nabaoni'o." Ua buonai Aberahamo hanona aika hamaka Tirama wairanai. Aberahamo ehore Tirama weiana 'ari haukia ebamaurinakia abomo a'i terama tabakia ebaramanakia hauna ea'ikakaumana.

18 Tirama Aberahamo miori kebena weiana raona ikoinai anikia aha'i 'ekana'i Aberahamo hanona ea'ikakauma ena raona ikoinai, ua buonai ia hanona hanopaka bo'ona hamakiai eao, Puka robenai e'abi ihobona, "'Aba'abamu hanona bihiu 'abana ua kebo'o aiho."

19 Aberahamo ihauna hanona hinabu hamomo buonai eonobaina matoha 'ari hauna 'abana mai Sara abomo miori kebaramana 'ekana aha'i, ia Aberahamo ena a'ikakauma hanona a'i eba'abe'abena.

²⁰ Weiana Aberahamo Tirama ena 'abi'uaiai aona a'i ebakai'au kai'auna ena a'ikakaumai ekori 'ini weianai etabura Tirama ebanamona.

²¹ Haeamona e'iohi haraina Tirama hanona mai hiabuna ena 'abi'uai kebabaina.

²² Neiana buonai, "Tirama Aberahamo ena a'ikakaumai eba tohana, bero haunai ebaona."

²³ Ia ebatohana bero haunai ebaona 'abina tererena hanona Aberahamo ikupaiana paunai aha'i.

²⁴ Ia aika abomo bero haukai kebaonaka pokina Iesu eka Obiapaka, 'ariai ebamikiri muena Tiramana naha'ikakaumana paunai.

²⁵ Tirama Iesu ebaibeni aina e'ari aika eka ki'a paunai, haeamona ebamikiri muena emauri aika bero kebenaka paunai.

5

Beroka Ehinana Paunai Kahaonamo.

¹ Weiana eka a'ikakaumai bero ha'ina buonai Tirama kipokia baibuai kahamiaho Iesu Keriso eka Obiapaka paunai.

² Aika naha'iohina a'ikakauma taearana weianai hatoto ia paunai aoko'o hoana neiana aonai aba nahamiaho, raona apa'uana weiana Tirama ena nuabi aonai kahatoto hauna nahaonamo aina.

³ Weiana mo aha'i, ia haiara ranikiai abomo nahaonamo, pokina naha 'iohina haiara nihore bakiro nibaramana,

⁴ Bakiro nihore rabo harai nibaramana, abomo rabo harai nihore raona apa'uana nibaramana.

⁵ Raona apa'uana neiana hanona abiabika a'i kea'i ki'ana, pokina Tirama ena raona'au Auba

Robeai eheina aika aokai, Auba Robe weiana hanona Tirama ebaibeni aika 'euka.

⁶ Aika kipoka bero kahatabuna a'i etaina aonai Tirama enuatae ranina tohanai Keriso e'ari aka ki'a hauka paukai.

⁷ Hau ha bero hauna paunai ke'ari hanona kepahihi. Pa'e baika katenuatae re'a namo hauna paunai kate'ari.

⁸ Ia ki'ai hamiaho oho aonai Keriso e'ari aika paukai, Tirama ena raona'au ua ebaiha aihonaka.

⁹ Ua buonai Keriso e'ari aruarunai Tirama bero ebenaka. Aika naha'iobi haraina ia paunai Tirama ena opuere aonai kebamaurinaka.

¹⁰ Aika hanona Tirama ena 'ou haukai haeao aonai Nahuna e'ari paunai kipokia habaibua, aba habaibua hauka naha'iobi haraina Keriso ena mauriai kebamaurinaka.

¹¹ Weiana mo aha'i, aika abomo Tirama aonai nahaonamo eka Obiapaka Iesu Keriso paunai bariu aika Tirama kipokia aba habaibua.

Adamu 'Eunai 'Ari Emai Ia Keriso 'Eunai Mauri Emai.

¹² Hau hamona paunai ki'a hanopakai etoto, ki'a ehore 'ari etoto aina, ua buonai 'ari emai maearima ikoikiai herekia, taeara weianai ikoikiai teaka ki'a.

¹³ Ki'a hanona aba erama 'uai hanopakai, ba rauhuhu tebaibeni. Rauhuhu aha'i paunai ki'a hanona ki'ai a'i tebaona.

¹⁴ Ia 'ari hanona epoki Adamu ena raniai emai mo Mose ena raniai, maearima ikoinai Adamu ena aka ki'a ihobonai a'i tebabai ki'a haukia abomo te'ari.

Ua buonai Adamu hanona muriai kemai hauna ibabataina.

¹⁵ Ia Tirama ena beruberu hanona Adamu ena ki'a 'abana aha'i. Pokina hau hamona ena ki'a paunai maearima bo'ona te'ari, ia Tirama ena aoko'o hoana hanona eapa'ua ki'a baha, Adamu ena ki'a etara haona weiana hanona ena aoko'o hoana beruberuna hau hamona Iesu Keriso paunai bo'ona katemaui.

¹⁶ Haeamona Tirama ena beruberu apa'uana mai hau hamona ena babai ki'a terarua hanona a'i teihobo, hau hamona ena babai ki'ai beho bakaina emai, ia beruberu apa'uana emai bero ebaramana.

¹⁷ Hau hamona ena aka ki'a paunai 'ari ehore epoki ainakia, aika naha'iohi haraina weiakia Tirama ena aoko'o hoana apa'uana eba'oruna hauna mai bero beruberuna katea'ina haukia mauri banaibanai aonai katepoki hau hamona Iesu Keriso paunai.

¹⁸ Weiana buonai hau hamona ena aka ki'ai maearima ikoikiai puma tea'ina, abomo hau hamona ena aka beroai bero emaiaina maearima ikoikiai mauri banaibanai ebenakia.

¹⁹ Hau hamona ena aia o'o aha'i paunai maearima bo'ona ki'a haukiai teao, abomo hau hamona ena aia o'oi maearima bo'ona bero haukiai kateao.

²⁰ Rauhuhu ekori hanona maearima ekia ki'a kateiha haraina ia ekia ki'a eapa'ua hao apa'ua hao. Ia ki'a eapa'ua 'ekana Tirama ena aoko'o hoana hanona eapa'ua haonakia.

²¹ Weiana buonai ki'a epoki 'ari taearanai abomo Tirama ena aoko'o hoana bero taearanai kepoki keaoainaka mauri banaibanai 'ekana Iesu Keriso eka Obiapaka paunai.

6

Ki'a 'Eunai Kaha'ari Ia Keriso 'Eunai Kahamauri.

¹ Uahomana raninai aika 'abi tabana kaha'uahina? Tirama ena aoko'o hoana keapa'ua paunai ki'a kahababai to'o baihana, u?

² Ua a'i kehoma. Aika ki'a herenai aba ha'ari ki'a hiabunai hakaobo ba aehoma buonai ki'a aonai kahamiaho mue?

³ Aika Keriso Iesu kipokia aba eba'uere robe-naka hauka hanona ena 'ariai abomo kipokia aba eba'uere robe haeamonaka, weiana a'i to'iohina, u?

⁴ Ua buonai 'uere robeai aika hanona ia kipokia ha'ari abomo ia kipokia tehorenaka, weiana Keriso Hamana nuabina hiabunai 'ariai ebamikiri muena. Ua buonai aika abomo mauri mahamahanai kahamiaho.

⁵ Aika ia kipokia ha'ari haeamo raninai ia 'ariai emikiri mue ihobonai aika abomo 'ariai kahamikiri mue.

⁶ Aba ha'iohina aika hauka 'ai'aina* Keriso kipokia matiu ibiri ropo 'ubina'i aba te'ari hanona hauka ena ki'a hiabuna aba weia ia'i obo, ba aika hanona ki'a ta'arana a'i kaha'i mue.

⁷ Pokina e'ari hauna hanona ki'a hiabunai aba irubu.

⁸ Bariu aika Keriso kipokia ha'ari raninai, naha'iohi tohana aika hanona ia kipokia kahamiaho oioi.

⁹ Pokina naha'iohina Keriso hanona 'ariai emikiri mue ba a'i ke'ari mue, 'ari hanona ia a'i kepoki ai muena.

¹⁰ 'Ari ia e'ari aina hauna hanona ki'a ikoikia'i kebaorenakia paukia'i rani hamonai e'ari, ia

* 6:6: (6) 'ao eka mauri 'ai'aina

mauri nimauro aina hauna hanona Tirama nu-abina paunai nimauro.

¹¹ Taeara ihobonai wai abomimo kipomi kato'iohinimi, ki'a herenai aba to'ari, ia Tirama 'eunai aba tomauro Keriso Iesu aonai.

¹² Weiana buonai ki'a kehore hauanimiti ke'ari hauna a'i kepoki aina ena nuatae akakia ki'a obokia a'i katoa'i taea.

¹³ Abomo hauanimiti papana ha ki'a aonai a'i katohorotina, ki'a akakia tabanai a'i keao, ia kipomi katobaibeni ainimiti Tirama herenai ihobona weiakia 'ariai temauri mue haukia 'abana, hauanimiti maikoina katobena, ia kehore bero akakia tabanai kebaonimiti.

¹⁴ Ki'a hanona wai emi poki haunai a'i keao, pokina wai hanona rauhubu ba'anai a'i tomiaho, ia Tirama ena aoko'o hoana ba'anai tomiaho.

Bero Tohana Ta'arana Kaha'i.

¹⁵ Ba aea kahahoma? Rauhubu ba'anai a'i nahamiaho ia Tirama ena aoko'o hoana ba'anai nahamiaho buonai ki'a kahababai, u? Aha'i 'akina.

¹⁶ Wai aba to'iohina weiana kipomi tubaibeni ainimiti hau ha herenai aiana tuona raninai ena ta'ara ia'inai tuao 'abana. Ua buonai ki'a ena ta'ara ia'inai niao ainimiti 'ari 'ekana 'ao Tirama aiana ionai niao ainimiti bero 'ekana.

¹⁷ Tirama kahabanamona. Pokina 'uainai wai hanona ki'a ena ta'ara ia'inai toao, ia bariu wai aomi maikoina teba'iohinimiti 'abina weiana toa'i taeana.

¹⁸ Wai ki'a herenai aba eirubunimiti, bariu bero ena ta'ara ia'inai tuao.

¹⁹ Maearima 'abi'abinai na'abi pokina aomi a'i niea paunai. 'Uainai hauanimiti tobaibeni aina aka ki'a obokia mai ripuripu ta'arakia ia'inai toao

ihobonai, bariu hanona hauanimi bero ena ta'ara ia'inai tomobaibeni, wai katorobe.

²⁰ Wai ki'a ena ta'ara ia'inai toao aonai wai hanona bero tohabo 'abaeana.

²¹ Rani weiakiai aka ki'a obokia buabuakia hanona taba totabu ahina? Bariu tuhaumaeai tabakia mo. Taba weiakia puakiai hanona 'ari.

²² Ia wai bariu hanona ki'ai aba irubu obo, ba Tirama ena ta'ara ia'ina haumiai tuao. Ua buonai buabuami hanona robe taearana tohanai, puanai hanona mauri banaibanai.

²³ Pokina ki'a 'arana hanona 'ari, ia Tirama ena beruberu apa'uana hanona mauri banaibanai Keriso Iesu aika eka Obiapaka kipokia.†

7

Keriso Rauhuhu ai Erubunaka.

¹ Uaho'aba'u e, au hanona wai rauhuhu to'jobina haumi nahina benimi, wai aba to'jobina rauhuhu hanona maearima nipoki aina maurina nemiaho aonai mo.

² Rauhuhu paunai babi'e ha atawana herenai kemiaho hau ena mauri beraurakia ikoikiai, ia hau ke'ari raninai ia hanona hawainibe rauhuhuna herenai aba irubu ta'i.

³ Weiana buonai hau nemiaho oho aonai babi'e kemikiri hau haeai ha keatawana raninai ia hanona nabau babi'ena kahahinana. Ia hau ke'ari raninai ia hanona rauhuhu herenai aba irubu ta'i. Hau haeai ha keatawana re'a ia nabauna a'i kahahinana.

⁴ Weiana buonai uaho'aba'u e, wai abomo Keriso ena 'ari paunai rauhuhu 'eunai to'ari, ba Keriso 'ariai emikiri hauna herena tuao, buabuaka katerama Tirama 'eunai.

† 6:23: (23) 'ao aonai

⁵ Aika hauani ena nuataeai hamiaho aonai, raona ki'a obokia terama rauhuhu 'eunai teaka huanikai ba buabuakia habaramanakia puana hanona 'ari.

⁶ Ia aika ebiri 'ininaka tabana herenai aba ha'ari buonai bariu rauhuhu herenai aba terubu ta'inaka, weiana buonai aika hanona taeara mahamahana Auba Robe 'eunai ta'ara kaha'i, ia rere rere 'ai'ainai aha'i.

Ki'a Ehore Eba'arinaka.

⁷ Ua buonai taba kaha'uahina? Rauhuhu hanona eki'a? Aha'i 'akina. Rauhuhu ehore au eba'jobina'u ki'a hanona taba. Rauhuhu a'i kehina bena'u, "Oi taba ha a'i konuataeai 'abaeana." raninai, au a'i ka'jobina nuatae 'abaea hanona taba.

⁸ Ia ki'a ehore taeara'u etabu rauhuhu 'abinai weia nuatae 'abaea haeai haeai ao'uai ebaramanakia, ia rauhuhu keaha'i raninai, ki'a hanona e'ari 'abana ena hiabu aha'i.

⁹ 'Uainai au hanona rauhuhu a'i a'jobina aonai araonana namo'u ai amaui amiaho, iamo rauhuhu 'abina a'jobina aonai ki'a hanona aiha tinana emauri mauri, au hanona a'ari 'abana.

¹⁰ Rauhuhu neiana hanona mauri ebaihanaka tabana, ia au 'eu'uai ia hanona 'ari tabanai eao.

¹¹ Pokina ki'a ehore taeara'u etabu rauhuhu ai e'oina'u ba 'ari hau'u ai ebaona'u.

¹² Ia rauhuhu kipona hanona erobe, rauhuhu 'abina kipona abomo erobe, weiakia hanona tebero mai tenamo.

¹³ Uahomana raninai taba namona weiana hauna ehore au e'u 'ari tabanai eao, u? Aha'i 'akina. Rauhuhu 'abina namonai ki'a ehore au here'uai 'ari ebaramana buonai, ki'a hanona i'iohi harai ai keao, rauhuhu 'abina paunai ki'a hanona ki'a tohanai eao.

Ki'a Eka Mauri Nipoki aina.

14 Ha'jobina rauhuhu hanona Tirama 'eunai emai, ia au hanona hauani 'eunai aeao, ki'a ehore ekawana'u ena ta'ara ia'inai naeao.

15 Au taba nababaina hauna obona a'i naobo, pokina nanuatae aina kababaina hauna a'i nababaina, ia taba 'arina a'i na'ari hauna nababaina.

16 Rauhuhu ehore namo mai ki'a ebaihanaka. Ba taba a'i nanuatae aina hauna nababaina raninai, au nabatohana rauhuhu hanona enamo.

17 Ua buonai nababaina hanona au kipo'u toha'u aha'i, ia ki'a ao'uai nemiaho hauna.

18 Au na'jobina taba ha namona ao'u ai a'i nemiaho, weiana hauani'u ena nuataeai a'i nemiaho, pokina au taba namona nanuatae aina kababaina ia ibabainai hanona a'i nitaina.

19 Aka namona nanuatae aina kababaina hauna a'i nababaina, haeamona aka ki'a obokia ibabaikia a'i nanuataeai haukia nababai to'o baihana.

20 Ia taba a'i nanuatae aina hauna nababaina raninai, nibabaina hauna hanona au toha'u aha'i, ia ki'a ao'uai nemiaho hauna niaka.

21 Weiana au aka taearana ha atabu ahina, au e'u nuatae aka namona kababaina, ia aka ki'a obokia mo tiwaira tina.

22 Ao'u tohana Tirama ena rauhuhu niaonamo aina.

23 Ia hauani'u ai rauhuhu haeai niaka aihana, rauhuhu weiana rauhuhu ao'uai nemiaho hauna nehuarina, weiana hanona hauani'u ai niaka ki'a ena rauhuhu ba'anai nebirina'u nibawapurana'u.

24 Au ki'a'u, aoko'o'u! Tai kehore au hauani'u neiana niaoaia'u 'ari 'ekanai hauna herenai kebamaurina'u?

25 Ia Tirama napaina Iesu Keriso eka Obiapaka eba maurina'u paunai. Ua buonai e'u mauri hanona nahomana, au ao'u tohana hanona Tirama ena rauhuhu ta'arana ia'inai niao, ia hauani'u hanona ki'a ena rauhuhu ta'arana ia'inai niao.

8

Keriso Eka Ki'a Ea'i Obo Ia Auba Robe Ebenaka.

1 Weiana buonai bariu Keriso Iesu aonai temiaho haukia hanona puma ha a'i katehoaina.

2 Pokina Keriso Iesu paunai Auba Robe rauhuhuna mauri nimaiaina hauna ehore ki'a mai 'ari rauhuhuna 'eukiai aba erubu obona'u.

3 Hauani ena 'abe'abe paunai rauhuhu ai a'i ketaina 'ekana Tirama ehore ehabaina. Ia ehore Nahuna hamomona euhuna, ki'a hauna 'abana ki'a 'aranai eao, maearima ekia puma ikoinai ehoina.

4 Weiana hanona aika hauani ena aka ki'a obokia a'i nahababai, Auba Robe ena nuataeai nahamiaho hauka aokai rauhuhu ena nuatae bero akana kebaore haraina.

5 Hauani ena nuataeai temiaho haukia hanona hauani tabakia mo tiraonanakia, ia Auba Robe ena nuataeai temiaho haukia hanona Auba Robe ena aka tabakia tiraonanakia.

6 Hauani ena raona ke'u ai aina puana hanona 'ari, ia Auba Robe ena raona ke'u ai aina puana hanona mauri banaibanai mai baibua.

7 Hauani ena raona ne'u ai aina hanona Tirama ni'oatana, pokina weiana hanona Tirama ena rauhuhu a'i nika'aina abomo kebabaina a'i ketaina.

8 Weiakia hauani ena raonai temiaho haukia hanona Tirama ibaonamonai hanona a'i ketaina.

⁹ Ia wai Tirama ena Auba Robe aomiaia nemiaho raninai, wai hanona hauanimi a'i nibaka'aniami, ia Auba Robe nibaka'aniami. Ia hau ha aonai Keriso ena Auba aha'i hauna hanona Keriso ena maearima aha'i.

¹⁰ Aomiaia Keriso nemiaho raninai hauanimi hanona abe'ari ki'a paunai, ia aubami hanona emauri bero paunai.

¹¹ Ia Tirama Aubana weiana Iesu 'ariaia ebamikirina hauna aomiaia nemiaho raninai Keriso Iesu 'ariaia ebamikirina Tiramana kehore wai hauanimi kate'ari haukia abomo keba maurinakia ena Auba Robe aomiaia nemiaho paunai.

Auba Robe Eaoainaka Tirama Nahunai Haeao.

¹² Weiana paunai uaho'aba'u e, aika hanona kahaka, ia hauani 'euna 'ara horeai aha'i, abomo hauani ena nuataeai a'i kahamauri.

¹³ Pokina hauani ena nuatae 'ekakiaia komiaho raninai oi hanona ko'ari Tirama wairanai, ia Auba Robe ena nuataeai hauani ena aka ki'a obokia koba 'arinakia raninai oi hanona komauri banaibanai.

¹⁴ Pokina weiakia Tirama ena Auba Robe ne'uai ainakia haukia hanona Tirama nahuna.

¹⁵ Wai hanona ta'ara'i mai ta'u aubana a'i toa'ina ia Auba Robe toa'ina, weiana hanona niaoainimi Tirama nahunai* tuao, Auba Robe weiana hiabunai Tirama nahaparina, "Hama'u,† au Hama'u."

¹⁶ Auba Robe weiana aika aubaka ohi tibatohana aika hanona Tirama nahuna.

¹⁷ Bariu aika Ia nahuna raninai aika hanona barina kaha'ina hauka. Tirama barina kaha'ina hanona Keriso kipokia Ia nahunai kahaeao

* **8:15:** (15) 'ao *bakiro nahunai* † **8:15:** (15) 'ao "Papa"

Tirama barina kaha'ina. Weiana Keriso kipokia ena haiara kahahaiara aina raninai ia nuabina abomo kaha'ina.

Wairai Kupa Aiaranai Nuabi Aonai Kahami-aho.

¹⁸ Au naraonana bariu rani neiana aika naha-hau haiara aina hanona taba papakia, ia nuabi weiana muriai aika 'eukai kewaira tina hauna keapa'ua ki'a baha.

¹⁹ Tirama ebagai tabakia ikoikiai hanona tibiai'imai ekia nuatae apa'uana Tirama nahuna katewaira tina.

²⁰ Pokina terama tabakia ikoikiai hanona taba anikia aha'i ba'anai temiaho, 'a ekia nuataeai aha'i, ia Tirama ena nuataeai.

²¹ Terama tabakia hanona hauani parina ena ibiri 'iniai kateirubu, Ba Tirama nahuna ekia nuabi irubuna aonai katemiaho haeamo.

²² Weiana aika ha'jobina terama tabakia maikoinai hanona mai ao pumakia matoha babi'e miori keba ramana haiarana 'abana emai mo bariu rani neiana.

²³ Iamo ikupaiakia aha'i, Tirama ena buabua kori'uaina Auba Robe ha'ina hauka abomo aoka niao puma mai nahabai'ima Tirama nahunai kebaonaka mai hauanika maikoina kebamaurinakia.

²⁴ Aika nuatae apa'uana neianai mauri ha'ina. Ia nuatae apa'uana weiana aba haihana raninai a'i kahanuatae aina. Tai hanona taba aba ea'ina hauna nuatae apa'uanai kebaona?

²⁵ Ia taba a'i naha'i bahana hauna nahanuataeai apa'uana raninai, aika hanona mai bakiroka kahabai'ima.

26 Taeara ihobonai Auba Robe hanona ni-barainaka eka 'abe'abe aokiai, aika aea ka-habahuba'ari aiho hanona a'i naha'iohina, ia Auba Robe kipona nihore nibahuba'ari mai ao pumana maearima ke'abi a'i ketaina haunai ninoinoi aika paukai.

27 Abomo maearima aokia neihanakia Tiramana hanona Auba Robe ena raona tabana e'iohina, pokina Auba Robe hanona Tirama ena maearima paukiai ninoinoi Tirama ena nuatae ihobonai.

28 Aika naha'iohina Tirama ehabainakia tabakia ikoikiai hanona tiaka haemo Tirama tiraona'au aina haukia mai ena nuataeai eaparinakia haukia ibanamokiai.

29 Pokina Tirama weiakia e'iohi 'uainakia haukia eba'orunakia Nahuna ihobonai kateao, ba Keriso hanona hau pakanai keao uaho'abana ikoikiai baiatakiai.

30 Eba'orunakia haukia ia ehore eaparinakia, eaparinakia haukia ia ehore beroai ebaonakia, beroai ebaonakia haukia ia ehore ena nuabi ebenakia.

Taba Ha Tirama Ena Raona'au Herenai A'i Kea'iparenaka.

31 Uahomana raninai taba neiakia aea ka-haroba ahuai aihonakia? Tirama aika nitainaka raninai tai hanona aika ke'oatanaka? Tai ha aha'i.

32 Ia nahuna hamomona a'i eubo aina, aika ikoikai paukai ebaibeni ai 'abaeana. Nahuna ebenaka buonai taba ikoikiai abomo kebeni 'abaeanaka.

33 Tai kehore Tirama ena a'itaea haukia atetua 'ekana'i kehorotinakia? Tai ha aha'i. Tirama hanona ia niba tohanakia a'i tebeho.

³⁴ Ba tai hanona puma kebenakia? Tai ha aha'i. Pokina Keriso Iesu e'ari, haeamona emikiri mue, ia hanona Tirama itipana tainai nemiaho, aika paukai ninoinoi.

³⁵ Tai kehore Keriso ena raona'au ai kea'i pare-naka? Atetua kehore 'ao bahaiara kehore 'ao bai'oata kehore 'ao arobo kehore 'ao uraru kehore 'ao ta'u kehore 'ao kareba kehore 'ao? Tai ha aha'i.

³⁶ Atetua weiakia hanona Puka Robenai terer-ena ihobona etibaha,
 “Ai hanona oi paumuai rani
 ikoikiai 'ari tawairana,
 ai hanona mamoe ai tibaonamai
 kateahu 'arinamai.”

Sal 44.22

³⁷ Ia taba neiakia ikoikiai aokiai aika hanona hatarahi, niraona'au ainaka hauna paunai.

³⁸ Pokina au aba a'iohi tohana, weiāna 'ari 'ao mauri, anerukia 'ao hiabu aubakia,‡ bariu temiaho tabakia 'ao wairai katemai tabakia, hiabu haeai haeai,

³⁹ hano 'ubinai 'ao hano ba'anai, terama tabakia ikoinai ha kehore Tirama ena raona'au herenai a'i kea'i parenaka, pokina aika eka Obiapaka Iesu Keriso aonai nahamiaho paunai.

9

Tirama Isaraela Haukia Etina'anakia.

¹ Abi tohana nahinana Keriso aonai, au hanona a'i nabai'oi Auba Robe abomo ao'u e'iohina.

² E'u ao ko'o hanona eapa'ua, ao aro'ari ao'uai hauna ena pua aha'i.

‡ 8:38: (38) auba ki'a obokia taburakia

³ Au kipo'u nanuatae hanona peururu aina'u Keriso 'eunai pa'eho 'ekanai uaho'aba'u weiakia e'u itubu haukia patemaui paunai.

⁴ Ia hanona Isaraela haukia, Tirama nahunai teao mai ena nuabi ebawaira tinana herekiai, herekiai 'abi'uai robena ebabaina rauhubu ebe-nakia, marea robe tohanai tekuti mai 'abi'uai tea'ina.

⁵ Ia 'aba'abakia hanona maearima apa'uakia, ia ekia kupuai hanona Keriso hauaniai erama, ia hanona taba ikoikiai nipoki ainakia Tiramana, kahabanamona banaibanai. Amen.

⁶ Au a'i natibaha Tirama ena 'abi'uai hanona e'eho, pokina Isaraela kupunai terama haukia re'a ikoikiai Isaraela haukia tohakia aha'i.

⁷ Aberahamo 'aba'abanai mo ia ikoikiai hanona nahuna tohakia aha'i. Pokina Tirama Aberahamo ehina bena "Isako herenai katerama haukia mo 'aba'abamu ai kateao."

⁸ Anina hanona miori hauaniai terama haukia hanona Tirama nahuna aha'i. Ia Tirama ena 'abi'uaiai katerama miorikia hanona Aberahamo nahuna tohakiai kateao.

⁹ 'Abi'uai hanona na ehina aihona, "Ihau wairai rani nahomanai au kamue hanona Sara miori ha keba ramana."

¹⁰ Weianai mo aha'i, ia Rebeka nahuna bai'apaea terama hamakia hamona Isako aika 'aba'abaka ena raniai abomo ihobo.

¹¹ Ia miori a'i terama baha mai taba ha namona 'ao ki'a obona a'i tebabai bahana aonai, Tirama ena a'itaea hanona aba ena nuataeai ebabaina.

¹² Ekia babai paunai aha'i ia ena apariai ebabaina, Tirama Rebeka ehina bena etibaha, "Hau pakana kehore hau i'irina ta'arana kea'i."

¹³ Puka robenai tererena ihobona etibaha, “Au Iakobo araona'au aina ia Esau 'arina a'i a'ari.”

¹⁴ Uahomana raninai taba kaha'uahina? Tirama hanona ena babai a'i tebero, u? Aha'i 'akina.

¹⁵ Tirama ehore Mose ehina bena etibaha, “Au pabarainakia haukia hanona kabarainakia mai paoko'o ainakia haukia hanona kaoko'o ainakia.”

Eso 33.19

¹⁶ Ua buonai Tirama maearima etina'ana hanona hau ha ena nuataeai 'ao aro'ariai aha'i, ia Tirama ena aoko'oai.

¹⁷ Puka robenai Tirama Parao ehina bena etibaha, “Au oi obia aranai ahoretini'o ena poki hanona neiana. E'u hiabu heremuai kabaiha baihaina, weianai hanopaka maikoinai au ata'u katehinana.”

¹⁸ Weiana buonai Tirama mo ena nuatae ihobonai keaoko'o ainakia haukia niaoko'o ainakia, aokia keba pahihinakia haukia aokia niba pahihinakia.

Tirama Ena Opuere Mai Aoko'o.

¹⁹ Uahomana raninai wai ha au kohina bena'u kotibaha, “Ua nihoma raninai, aehoma buonai Tirama eka beho nitabunakia? Tai kehore Tirama ena nuatae kekaiabuna?”

²⁰ E'u hau e, oi hau aea homamu, Tirama ena 'abi nubamuena? Uro a'i kehore ebabaina hauna a'i kehina bena, “Taba buonai na obabai aihona'u?”

²¹ Uro babai hauna hanona mai ena bero ia kehore tipu hamonai uro kebabainakia, ha hanona uro namona aka apa'uakiai keaka, ha hanona uro 'abaeana aka papakiai keaka.

²² Tirama hanona matoha uro babai hauna 'abana ena nuatae hanona ena opuere mai ena hiabu kebaiha baiha aina, iamo aona nia'i 'inina niopuere ainakia haukia herekiai keaomo 'ari ranina eba'oruna hauna kemai.

²³ Abomo enuatae ena nuabi apa'uana kebawaira tinana niaoko'o ainakia haukia herekiai hanona mai ena bero, weiakia aba eba'orunakia haukia hanona ena nuabi katea'ina.

²⁴ Uro hanona aika eaparinaka hauka, Iuda haukia mo aha'i, 'a rama haeai haukia baiatakiai abomo.

²⁵ Mahabanai hauna Hosea ena pukai ehinana ihobona etibaha,

“E'u maearima tohakia aha'i

haukia kaparinakia

‘e'u maearima.’

Itubu wei ana a'i naraona'au aina

hauna kaparina

‘e'u raona'au.’

Hos 2.23

²⁶ Ehina benakia,

wai hanona au e'u maearima aha'i

'ekanai haeamona keaparinakia

ia hanona Mauri Tiramana

nahuna.”

Hos 1.10

²⁷ Mahabanai hauna Isaia Isaraela haukia poukia ehinana etibaha,

“Isaraela maearimakia patebo'o

ki'a poe 'anona 'abana,

ia harina bita 'akimo bamauri

katea'ina.

²⁸ Obiapaka kehore noanoai bakai

'abina hanopakai kehore hore

haraina.”

Isa 10.22, 23

29 Ihobonai mo Isaia ehina 'uaina 'abana,
 “Tabura Obiapakana 'aba'abamai
 baika a'i pehabonakia raninai
 ai hanona Sodoma mai Gomora
 ihobokiai pataeao.”

Isa 1.9

*Rama Haeai Haukia Tea'ikakauma Ia Isaraela
 Haukia A'i Tea'ikakauma.*

30 Ua buonai taba ʻna kahahoma? Rama haeai
 haukia bero a'i titabuna ia aba tea'ina, weiana
 hanona a'ikakaumai tea'ina.

31 Ia Isaraela haukia rauhuhu taearanai bero
 tetabuna, ia a'i tetabu ahina.

32 Tabu buonai a'i tea'ina? Pokina a'ikakaumai
 a'i tetabuna ia teraonana akai katetabu ahina. Ia
 haukia kaikai rea piharanai weia tekai.

33 Puka Robenai tererena ihobona etibaha,
 “Moihana Siona oeo aonai
 pihara ha ahorotina
 weianai maearima kebakai kai
 reanakia, haeamona wairo
 piharana weiana kehore
 keba'ehonakia.
 Ia tai nia'ikakauma hauna
 hanona a'i kehaumaea.”

Isa 8.14; 28.16

10

Isaraela Tirama Ena Aka A'i Teiha Tinana.

1 Uaho'aba'u e, mai ao'u ikoinai e'u nuatae
 abomo e'u bahuba'ari niao Tirama herena, Is-
 araela haukia hanona patemaui.

² Au a'io**bi**na ia hanona aokia tohanai Tirama tenuatae aina, ia 'abi tohana herenai ekia 'io**bi** aha'i.

³ Ia a'i te'io**bi**na bero hanona Tirama herenai nimai, ia kipokia mo ekia bero tebakori haukia tia'i 'ini. Weiana buonai Tirama ena bero a'i tea'i taeana.

⁴ Ia Keriso hanona rauhuhu ebaorena, ba katea'ikakauma haukia ikoikiai hanona bero katea'ina.

⁵ Mose ehore rauhuhu ai bero kea'ina robana eahuna etibaha, “Hau ha rauhuhu taina ketai hanona ia aba kema**uri**.”

⁶ Ia bero a'ikakaumai nimai hauna na e'abi aiho, “Aomia**i** a'i kato'abi, Tai kekara'au keao kupa?” (Weia Keriso kebaririna.)

⁷ 'Ao, “Tai keriri keao 'uri aonai?” (Weia Keriso 'ari haukia baiatakiai kebakara'auna.)

⁸ Taba e'uahina hauna hanona neiana, “Tirama ena 'abi hanona wai heremia**i**, pinamia**i** mai aomia**i**.” Weiana hanona a'ikakauma 'abinai, ai tahore tairoro aina.

⁹ Pou hanona nahomana, oi pinamuai kohina pouna 'Iesu hanona Obiapaka, abomo Tirama hanona ia 'ariai ebamikirina hauna aomuai koa'ikakauma raninai oi hanona komauri.

¹⁰ Pokina aomuai oa'ikakauma hanona aba obero Tirama wairanai, abomo pinamuai kohina pouna hanona komauri.

¹¹ Weiana Puka Robenai e'abi etibaha, “Ia katea'ikakaumana haukia ikoikiai hanona a'i katehaumaea.”

¹² Iuda mai rama haeai haukia baiatakia ekia haeai hanona aha'i. Pokina Tirama hanona hamona ikoikiai ekia Obiapaka abomo atanai tekuti haukia ikoikiai hanona banamo nibenakia.

13 Puka Robenai e'abi ihobonai,
 “Obiapaka atanai tiapari
 haukia ikoikiai hanona
 katemaui.”

Iol 2.32

14 Ba weiakia herenai a'i tia'ikakauma haukia
 hanona aea kateapari aihona? Haeamona pouna
 a'i teona haukia hanona aea katea'ikakauma ai-
 hona? Abomo hau ha herekiai a'i keiroro raninai
 pou aea kateo'o aihona?

15 Mai pou ihinana haukia a'i kateuhunakia
 raninai pou hanona aea kateiroro ai aihona?
 Puka Robenai tererena ihobonai, “Pou namona
 timaiaina haukia hanona aekia hama ua tenamo
 aiho!”

Isaraela Haukia Pou Namona A'i Tea'itaeana.

16 Ia Isaraela haukia bo'ona hanona pou na-
 mona a'i tea'i taeana. Isaia e'abi ihobona, “Obi-
 apaka e. Tai hanona emai pou tea'ikakaumana?
 Tai aha'i.”

17 Weiana buonai a'ikakauma hanona pou ionai
 nimai, mai aia o'o hanona Keriso ena 'abiai nimai.

18 Ia au nabakai bakai, pou a'i teona, u? Aha'i.
 Pou hanona aba teona. Puka Robenai e'abi,
 “Aiakia hanona aba ekarahi eao
 hanopaka ikoikiai aokiai,
 abomo ekia 'abi hanona hanopaka
 puana abira abira etabu
 ahinakia.”

Sal 19.4

19 Haeamona nabakai bakai, Isaraela haukia obo
 a'i teobo, u? Aha'i, obo teobo. Kori 'uaina Tirama
 ena 'abi Mose ehinana,
 “Wai kabawamurunimi
 hanopaka haeai maearimakia

atakia aha'i haukia herekia,
mai wai kabaopuerenimi hanopaka
weiakia ekia aotipa Tirama
herenai aha'i haukia herekiai.”

Deu 32.21

²⁰ Abomo Isaia aona ebataburana e'abi etibaha,
“Weiakia a'i tetabuna'u haukia
hanona tetabu ahina'u.
Abomo a'i tenoina'u haukia
herekiai kipo'u abawaira
tinana'u.”

Isa 65.1

²¹ Ia Isaraela 'abikia ehinana etibaha,
“Beraura hamona maikoina
ima'u atiu ahina weiakia
aia a'i tio'o mai tikamuri
haukia na'imanakia katemue.”

Isa 65.2

11

Tirama Isaraela Eaoko'o ainakia.

¹ Ua buonai au haeamona nabakai bakai,
Tirama ena maearima ebaki'anakia, u? Aha'i
'akina. Au abomo Isaraela hau'u, Aberahamo
'aba'abana, Beniamina ena itubu hau'u.

² Tirama ena maearima etina'a 'uainakia
haukia hanona a'i ebaki'anakia. Puka Robenai
mahabanai hauna Elia robana eahuna 'abina
wai aba to'jobina. Elia ehore Tirama wairanai
Isaraela haukia ehinau ainakia etibaha,

³ “Obiapaka e, ia emu mahabanai haukia aba
teahu 'arinakia, mai emu itara robekia aba
terubu 'iti 'itinakia, au mo ikupaia'u namiaho,
abomo titabuna'u kateahu 'arina'u.”

⁴ 'A Tirama Elia ena 'abi ebamuena taba na
ehoma? Ia etibaha, “Au hanona kipo'u e'u

maearima aba taha 'abaihau hamomo (7,000) bai'oi tiramana Baala a'i tekuti aina haukia abauhu ahinakia.”

⁵ Weiana bariu abomo taeara ihobonai maearima harina Tirama ena aoko'o hoanai ea'i taeanakia haukia temiaho.

⁶ Tirama ena a'itaea hanona ena aoko'o hoana paunai, ia maearima ekia aka paukiai aha'i. Ekia aka paukiai ea'i taeanakia raninai Tirama ena aoko'o hoana hanona anina aha'i.*

⁷ Uahomana raninai taba na kahahoma? Is-araela haukia taba titabuna hauna hanona a'i tetabu ahina, ia Tirama ea'i taeanakia haukia tebabita mo weiana tetabu ahina. Ia harina bo'ona hanona aokia teba pahihina.

⁸ Puka Robenai tererena ihobona etibaha,
 “Tirama ehore aokia eba
 paruanakia, mahakiai a'i
 teihaiha mai haiakiai aia
 a'i teona emaimo bariu.”

Deu 29.4; Isa 29.10

⁹ Abomo Davida Tirama ehina bena etibaha,
 “Ekia tatu 'itarana hanona rio
 mai ba'ai kate'aeana
 ba katebato'onakia kate'eho
 puma katea'ina.

¹⁰ Mahakia kobaparua 'arinakia
 a'i kateiha, mai kapekia
 kobabeho baihanakia
 rani ikoinai.”

Sal 69.22, 23

Tirama Ena Bamauri Rama Haeai Haukia Tea'ina.

* 11:6: (6) 'ao a'i keaka.

¹¹ Uahomana raninai haeamona nabakai bakai, ia hanona rioai teto'o te'eho aba tepua baihana, u? Aha'i 'akina. Ia ekia 'eho paunai rama haesai haukia bamauri aba tetabu ahina, ba Isaraela haukia ia katewamuru ainakia.

¹² Isaraela haukia ekia behoi hanopaka maearimakia banamo rarina tetabu ahina, abomo Tirama ena bamauri aonai te'eho hanona rama haesai haukia banamo rarina tetabu ahina. 'A Isaraela haukia ikoikiai Tirama ena bamauri aonai katetoto raninai, banamo hanona keapa'ua ki'a baha.

¹³ Au hanona wai rama haesai haumi nahina benimi. Au Tirama ena iuhubeau hau'u rama haesai haukia 'eukiai paunai, aka nababaina hauna kapaina.

¹⁴ Weiana kababaina aonai e'u nuatae apa'uana e'u rama haukia kaba wamurunakia Keriso kate a'ikakaumana, ba Tirama kehore baika keba-maurinakia.

¹⁵ Tirama Isaraela haukia ebaki'anakia paunai hanopaka maearimakia ehaunakia. Ba Tirama Isaraela haukia kea'i totonakia raninai taba kerama? Weiana hanona 'ari haukia katemaui.

¹⁶ Parawa puapuana Tirama nahabena hauna erobe raninai parawa maikoina abomo erobe, ramu erobe raninai rena abomo terobe.

¹⁷ Olibe ibato rena baika aba ikabe obo 'ekakia Olibe 'aki rena patea'ina Olibe ibato huanai pate'apa to'ona, ramu hamonai hoho katea'ina, ba oi hanona Olibe 'aki rena.

¹⁸ Re weiakia tekabe obonakia haukia herekiai a'i koapa. Koapa re'a neiana koraonana, oi hanona ramu a'i nubaraina, ia ramu hanona oi nibaraini'o.

19 Ua buonai oi hanona ko'abi, “Re weiakia tekabe hurinakia 'ekakiai au pa'e kate'apa to'ona'u.”

20 'Abi tohana, ekia a'ikakauma aha'i paunai Tirama ebamohu hurinakia, ia oi hanona emu a'ikakauma buonai 'ekana'i okoroti. Ua buonai a'i koapa, ia kota'u.

21 Pokina Tirama re tohakia a'i eaoko'o ainakia raninai, oi abomumo a'i keaoko'o aini'o.

22 Weiiana buonai Tirama ena namo mai ena pahihiki koraonana, weiakia te'eho haukia hanona Tirama herekiai nipahihiki, ia ena namo aonai komiaho hanona oi heremuai kenamo. Ua a'i kobabai aiho raninai, oi abomo ikabe huri.

23 Ia ekia kamuri kamuri patehabonakia raninai Tirama kehore ke'apa to'o muenakia, pokina ua kebabai aiho hanona ketaina.

24 Wai rama haeai haumi hanona matoha 'aki matiuna rena 'abana, ua buonai i'apa to'o matiu ibato hauna huanai hanona ke'ama'ama. Ba Tirama kehore Olibe ibato rekiakia ikabe huri haukia matiukia tohakiai ke'apa to'o muenakia hanona ke'ama'ama ki'a baha.

Tirama Ena Aoko'o Maearima Ikoikiai Ahakiai.

25 Uaho'aba'u e, au nanuatae wai 'abi bunina neiana kato'iobina, kipomi emi aotipa a'i katoapaina. 'Abi bunina weiiana hanona Isaraela haukia bariu baika aokia tibapahihiki keaomo Tirama etina'anakia rama haeai haukia ikoinai katekatoto 'uai.

26 Ba Isaraela haukia ikoikiai katemaui. Puka Robenai ererena ihobonai etibaha,
 “Siona ai bamaui hauna
 ha kemai.
 Ia kehore Iakobo 'aba'abana
 herekiai Tirama ia'i ki'ana

tabakia kebairu parenakia.

²⁷ Rani weianai ekia ki'a
ka'i parenakia Au e'u 'abi'uai
ihobonai.”

Isa 59.20, 21; 27.9

²⁸ Iuda haukia pou namona tibaki'ana ihobona
Tirama ena 'ou haukiai tiao hanona wai
rama haeai haumi emi namo tabanai eao, ia
'aba'abakia ea'i taeanakia paunai ia Tirama ena
raona'au aonai temiaho.

²⁹ Pokina Tirama ena apari mai ena beruberu
hanona a'i kebahaeeaina.

³⁰ 'Uainai wai rama haeai haumi Tirama ena
'abi a'i toa'i taeanakia, ia bariu hanona wai
Tirama ena aoko'o aba toa'ina, pokina Iuda
haukia Tirama ena 'abi a'i tea'i taeana paunai.

³¹ Taeara ihobonai bariu Iuda haukia hanona
Tirama ena 'abi a'i tia'i taeana, 'a aoko'o weiana
toa'ina ihobonai ia abokiamo Tirama ena aoko'o
weiana katea'ina.

³² Tirama ehore maearima ikoikiai 'abi a'i tia'i
taeanakia 'ekanai ekaiabunakia, pokina weianai
ena aoko'o kebaihanakia.

Tirama Atana Kahabanamona.

³³ Tirama hanona eaobero
mai eaotipa ki'a baha
ihobona 'aku 'ourana 'abana.
Ena raona harai 'abina hanona
tai kehore kehina haraina?
Ena hoahoa taearana hanona
tai kehore ke'iobi haraina?
Tai aha'i.

³⁴ Puka robenai e'abi,
“Tai hanona Obiapaka
aona e'ibina? 'ao,
Tai hanona ia ena bairobe

haunai eao?

Isa 40.13

³⁵ Tai kehore taba ha
Tirama kebeni 'uaina
ba Tirama taba weiana 'arana
kehorena?"

Iob 41.11

³⁶ Taba ikoikiai ibaramakia hanona
Tirama, taba ikoikiai Ia paunai
tekarahi, abomo taba ikoikiai
Ia 'eunai kateao.
Nuabi hanona Tirama herenai
keaomo banaibanai. Amen.

12

Eka Kuti Hoana Tohana.

¹ Ua buonai uaho'aba'u e, Tirama ena aoko'o rarina 'akina paunai nanoinimi, hauanimiti mai aomi maikoina Tirama katobena, baibeni tabakia mauri maurikiai kateao, katerobe Tirama aona katebanamona. Emi kuti hoana tohana* hanona weiana.

² Hanopaka neiana ena hoahoa a'i katohobo hobo aina, 'a aomi katobamaha mahanakia emi mauri katobahaeaina, weianai Tirama ena nuatae hanona taba, ia niaonamo aina hanona taba mai namona tohana hanona taba kato'iobi haraina.

Tirama Ena Ibeni Ebeni'o Hauna Akana Kobabaina.

³ Barai barai apa'uana ebena'u paunai, au wai ikoimiai nahina benimi. Kipomi a'i katoraona apa'uanimi, ia kipomi katoraona raona, aomi

* **12:1:** (1) 'ao *Aubami kuti hoana*

katebero, Tirama ehore ha ha emi a'ikakauma aea homakia ebenimi ihobokiai.

⁴ Aika hauanika hanona hamona ia puana hanona ebo'o, ia ekia aka hanona haeai haeai.

⁵ Taeara ihobonai aika hanona habo'o, ia Keriso aonai hanona hauani hamona, puakia haeai haeai nahabahamomo.

⁶ Tirama ena aoko'o hoanai beruberu tabakia haeai haeai aba ebenaka, hau ha ena beruberu hanona mahabanai re'a ia kemahabanai ena a'ikakauma ihobonai.

⁷ Hau ha ena beruberu ta'ara a'i re'a ta'ara kea'i, hau ha ena beruberu ba'iobi re'a keba'iobi.

⁸ Batabura hauna kebatabura, baibeni hauna kebaibeni mai aona ikoinai, 'uai hauna ke'uai mai bakirona, aoko'o hauna keaoko'o mai aonamona.

Aoka Tohanai Uaho'abaka Kaharaona'au aina.

⁹ Emi raona'au hanona katobatohana. Ki'a tabakia 'arikia a'i kato'ari, namo tabakia kato babainakia.

¹⁰ Ha ha katoraona'au ainimi uaho'abami 'abana, abomo ha ha katomariki ainimi.

¹¹ Katoaka tabura a'i kato'aboro. Auba hi-abunai Obiapaka ena ta'ara katoa'ina mai aomi ikoinai.

¹² Nuatae apa'uana aonai katoaonamo. Aro'ari ranikiai katotabura. Rani ikoikiai katobahuba'ari.

¹³ Tirama ena maearima teuraru haukia kato-barainakia. Baki haukia katoa'i taeanakia emi ituai.

¹⁴ Ti'oatanimi haukia Tirama katonoina kebanamonakia, a'i katoururu ainakia, ia katoba namonakia.

¹⁵ Tiaonamo haukia kipokia katoaonamo, weiakia tihaihai haukia kipokia katohai.

¹⁶ Ikoimiai emi miahoai aomi katehamomo. A'i katoapa, 'aiaunu haukia kipokia katomiaho haeamo. Kipomi emi aotipa a'i katoapainakia.

¹⁷ Hau ha ena aka ki'a heremiai hauna 'arana ki'ai a'i katobamuena, ia maearima ikoikiai wairakiai aka namokia katobabainakia.

¹⁸ Ketainimi taearanai, maearima ikoikiai kipokia baibuai katomiaho.

¹⁹ E'u hau e, ki'a 'arana kipomi a'i katobamuena, katohabona Tirama ena opuere kebabaina. Pokina Puka robenai aba tererena, "Obiapaka e'abi, 'Ara hore hanona au ima'u ai, au kahore 'arana kabamuena."

²⁰ Haeamona tererena,
 "Emu 'ou hauna mare'a ni'ari
 raninai aniani kobena,
 abomo 'akona ni'ororo
 raninai bei kobena.
 Babai neiana kobabaina
 hanona ia kobahaumaeana
 ihobona matoha 'aranai iruba
 nuhore 'auna."

Her 25.21, 22

²¹ Aka ki'a kehore wai a'i kehaoti boanimi, ia emi aka namokiai aka ki'a katohaoti boana.

13

Aika Kabamani Ena Hiabu Ba'anai Kahamiaho.

¹ Maearima ikoikiai hanona tipoki ainakia haukia aiakia katea'i taeanakia. Pokina poki hanona kipona a'i erama ia Tirama herenai emai, poki haukia ikoikiai hanona Tirama ehore ebakorinakia.

² Weiana hau ha poki hauna ni'oatana hanona ihobona mo Tirama ebakorina hauna ni'oatana,

bai'oata akana nibabaina hauna hanona kipona ena puma ketabu ahina.

³ Pokina aka namona tibabaina haukia hanona poki haukia a'i tita'u ainakia, ia beho babai haukia mo. Oi nonuatae poki hauna a'i kota'u aina? Ua homana re'a aka namokia kobabai, ba ia kehore oi kebanamoni'o.

⁴ Ia hanona Tirama ena ta'ara a'i hauna emu namo akana nibabaina. 'A pobabai ki'a hanona ia pota'u aina. Pokina ia hanona tare a'i ea'i 'abaeana. Ia hanona Tirama ena ta'ara a'i hauna babai ki'a haukia 'arakia kebenakia.

⁵ Ua buonai poki haukia aiakia kahaona, puma herenai kahakapare paunai mo aha'i, ia raona bero paunai abomo.

⁶ Ua buonai wai abomo takiti monina tubaibeni, pokina ia hanona Tirama ena ta'ara a'i haukia, rani ikoinai barai barai akana neiana tibabaina.

⁷ Taba katobaibeni Kabamani herekiaia haukia kato benakia. Moni bararo haeai haeai haukia katobaibeni, tita'u aina hauna katota'u aina, timariki aina hauna katomariki aina.

'Abami 'Arikia Kato'ari Toha.

⁸ Hau ha herenai taba ha a'i koa'i 'abaea 'uaina, ia taba kahababai to'o baihana hauna hanona ha ha kaharaona'au ainaka. Herena hauna ni-raona'au aina hauna hanona rauhuhu aba nika'ai haraina.

⁹ Rauhuhu neiakia, 'A'i konabau ki'a, a'i koahuahu, a'i kobainao, abomo hau ha ena taba a'i konuataeai 'abaeana' mai rauhuhu baika kipokia teba hamomonakia hanona 'abina

apa'uana hamona neiana, 'Heremu hauna ko-raona'au aina ihobona kipomu nuraona'au aini'o 'abana.'

¹⁰ Hau ha mai ena raona'au hauna nihore herena hauna a'i nia'i ki'ana. Ua buonai katoraona'au hanona rauhuhu maikoinai aba tubatohana.

Ea Taearani Kahaka'a.

¹¹ Rani neiana tabana hanona to'jobina paruai katono'a raona'au akana katobabaina ranina aba ekara'au. Pokina popounai ha'ikakauma raninai ibamaurika beraurana hanona atau'ai 'a bariu hanona aba herekai.

¹² Rabi aba niore mararani Iesu ena mai ranina hanona aba herekai. Ua buonai wapura akakia hamahabonakia, ia ea ena huari hoakia hama'inakia.

¹³ Eka hoahoa patenamo ihobona mararani nahababai 'abana. A'i kaharipu ripu, a'i kahainu 'ari, a'i kahanabau, a'i kaharea, a'i kaha'au, a'i kahawamuru.

¹⁴ Obiapaka Iesu Keriso hanona emi huari habuninai katobaona, ia hauanimi ekia nuatae akakia ki'a obokia a'i katoa'i taeanakia.

14

Uaho'abami Puma A'i Katobena.

¹ Hau ha ena a'ikakauma e'abe'abe hauna katoa'i taean, ia ena raonaraona weiana hauna a'i kato'abi baitaeai aina.

² Hau ha mai ena a'ikakauma taba ikoikiai niani, ia ha ena a'ikakauma e'abe'abe hauna uma tabakia mo niani.

³ Taba ikoikiai niani hauna a'i niani hauna herenai a'i kea'i ki'ana abomo uma anianikia mo niani hauna taba ikoikiai niani hauna a'i

ke'uahina, pokina Tirama ehore ia terarua aba ea'i taeanakia.

⁴ Oi hanona tai, hau ha ena ta'ara a'i hauna no'uahina? Ia kekori 'ini 'ao ke'eho re'a weiana hanona poki hauna ena hiabu. Ia hanona kekori 'ini pokina Obiapaka hanona mai hiabuna kebakori 'inina.

⁵ Hau ha niraonana beraura ha hanona etara ahi ba beraura baika, mai hau ha niraonana beraura ikoikiai hanona ihobo. Ha ha kipokia ekia raona raona katebakori harainakia.

⁶ Hau neiana niraonana beraura ha eapa'ua Obiapaka paunai, hau weiana taba ikoikiai niani Obiapaka paunai, pokina kateaniani raninai Tirama tibanamo 'uaina. Mai hau ha Obiapaka paunai aniani baika nibaki'anakia, ia abomo Tirama nibanamona.

⁷ Pokina aika baiatakai hau ha a'i nimaui ia kipona paunai, abomo hau ha a'i ni'ari ia kipona paunai.

⁸ Nahamaui hanona Obiapaka paunai nahamaui abomo kaha'ari hanona Obiapaka paunai kaha'ari. Ua buonai kahamaui 'ao kaha'ari re'a aika hanona Obiapaka 'euna.

⁹ Neiana buonai Keriso e'ari abomo emauri mue, 'ari mai mauri haukia ekia Obiapakai keao.

¹⁰ 'A oi aehoma buonai uaho'abamu behoai nuhorotina? Aehoma buonai nua'i ki'ana? Aika ikoikai hanona Tirama wairanai ena bakai 'ekana kahakoroti.

¹¹ Puka robenai tererena ihobona,
“Obiapaka ni'abi;
Au namaui toha buonai,
maearima ikoikiai au waira'u ai
katekaipehu, abomo maearima

ikoikiai pinakiai katehina
pouna'u Au hanona Tirama.”

Isa 45:23

¹² Ua buonai aika ikoikai ha ha Tirama wairanai
kipoka pouka kahahina.

Uaho'abami A'i Katoba'ehona.

¹³ Ua buonai aika ha ha kipoka behoi a'i
kahahorotinaka. Abomo uaho'abaka ia'i ki'ana
'ao iba'ehona ki'a aonai raonana a'i kaharaonana.

¹⁴ Au Obiapaka Iesu aonai a'iohina abomo
nabatohana aniani tabakia ha kipona a'i eki'a
Tirama wairanai, 'a hau ha niraonana aniani
tabana ha eki'a raninai aniani weiana hanona
eki'a ia kipona herenai.

¹⁵ Ia emu aniani tabana buonai uaho'abamu
aona nubahaiarana raninai, oi hanona raona'au
taearanai a'i nuka'a. Uaho'abamu weiana pau-
nai Keriso e'ari hauna emu aniani koana hauna
buonai a'i moa'i ki'ana.

¹⁶ Ua buonai nuraonana hoahoa oi heremuai
enamo hauna ko'ima haraina ki'a obona a'i teme-
hinana.

¹⁷ Pokina Tirama ena obia aiarana hanona
aniani mai inuina tabana aha'i, ia bero, baibua
mai aonamo, weiakia hanona Auba Robe nima-
iainakia.

¹⁸ Hau ha taeara neiakiai Keriso ta'arana
nia'i hauna hanona Tirama ia niaonamo aina
maearima abomo ena namo tibatohana.

¹⁹ Ua buonai rani ikoinai mai taburaka baibua
taearakia kahatabu, abomo ha ha kahaba tabu-
ranaka.

²⁰ Aniani paunai Tirama ena aka a'i koa'i ki'ana.
Aniani ikoikiai hanona tenamo, iamo oi aniani
tabana ha nuana paunai 'abamu ki'a aonai ketoto
raninai ki'a hanona oi heremuai.

²¹ Uaho'abamu aona ibaro'arina akana a'i kob-abaina hanona enamo, mahi weiakia a'i koani a'i koinu 'ari.

²² Ua buonai raona neiakia emu a'ikakaumai ko'ima harainakia Tirama mai oi torarua ba-iatamia. Hau ha taba ha kipona niraonana ebero hauna nibabaina aonai, aka weiana paunai aona a'i kearo'ari hauna hanona enamo.

²³ 'A aona mai kai'au kai'auna nianiani hauna hanona Tirama ia puma nibena, pokina ani-ani weiana aonai ia a'i nia'ikakauma paunai. A'ikakaumai a'i tibabainakia tabakia ikoikia hanona teki'a.

15

Kipoka A'i Kahabaonamonaka 'Abaka Kahabarainakia.

¹ Aika a'ikakaumai hatabura hauka hanona a'ikakaumai te'abe'abe haukia ekia puma kahabuana. Aika kipoka eka aonamo mo a'i kahatabu.

² Ha ha hereka haukia kahaba aonamonakia kipokia ekia namo paunai, weiana kehore ekia a'ikakauma kebataburana.

³ Pokina Keriso abomo kipona ena aonamo mo a'i etabuna. Puka Robenai tererena ihobona etibaha,

“Bapo'o po'o 'abikia oi
tebapo'o aini'o haukia
au abomo tebapo'o aina'u.”

Sal 69.9

⁴ Uainai terere tabakia hanona aika ibamarereka paunai tererenakia, weiana Puka robena kahatubabina hanona aika bakiro mai tabura kebenaka keaomo nuatae apa'uana kahatabu ahina.

⁵ Au nabahuba'ari bakiro mai batabura nibaibeni Tiramana kehore Keriso Iesu murinai katoka'a raninai aomi keba hamomonakia.

⁶ Ba ikoimiai mai aomi hamona abomo aia hamonai Tirama aika eka Obiapaka Iesu Keriso Hamana katobanamona.

Pouna Namona Rama Haeai Haukia Herekiai Abomo Teihobo.

⁷ Ua buonai 'abami katoa'i taeanakia ihobona Keriso ea'i taeanimi 'abana, babai weianai Tirama kahabanamona.

⁸ Au wai nahina benimi, Keriso hanona Tirama ena 'abi tohana paunai Iuda haukia* ekia ta'ara ia'ina haunai eao, Tirama ena 'abi 'uai 'aba'abakia herekiai haukia ibatohakia paunai,

⁹ abomo rama haeai haukia Tirama katebanamona ena aoko'o paunai. Puka robenai tererena Davida e'abi ihobona,
 “Ua buonai rama haeai haukia baiataki ai kabanamoni'o, abomo Oi atamu kahui aina.”

Sal 18.49

¹⁰ Haeamona Mose e'abi etibaha,
 “Rama haeai haumi e, Tirama ena maearima kipokia katoaonamo haeamo.”

Deu 32.43

¹¹ Haeamona Davida e'abi etibaha,
 “Rama haeai haumi ikoimiai, Obiapaka katobanamona. Abomo maearima ikoimiai, ia katohui aina.”

Sal 117.1

¹² Haeamona Isaia e'abi,

* 15:8: (8) 'ao itare tea'ina haukia

“Iese ena rama nininai
 hau ha kewaira tina,
 rama haeai haukia kepoki ainakia.
 Rama haeai haukia katehore
 ia ikupaiana katenuataeai
 apa'uana.”

Isa 11.10

¹³ Au nabahuba'ari, nuatae apa'uana nibaibeni
 Tiramana kehore emi a'ikakaumai aonamo mai
 baibua ikoinai kebabonunimi. Weiana Auba
 Robe hiabunai emi nuatae keba apa'uana rani
 ikoinai.

*Paulo Rama Haeai Haukia Ekia Aka Haunai
 Eao.*

¹⁴ Uaho'aba'u e, au a'iobi haraina wai hanona
 emi hoa namokia tebo'o, mai ikoimiai hanona
 a'ikakauma taearana to'iobi haraina buonai,
 kipomi ha ha katoba'iobinimi hanona ketaina.

¹⁵ Ia marere neiana aonai taba baika mai
 tabura'u arere benimi hanona wai ibaraonami,
 neiana hanona Tirama ena aoko'o hoana ebena'u
 paunai.

¹⁶ Au hanona Keriso Iesu ena ta'ara a'i hau'u
 ai aeao rama haeai haukia 'eukiai, kaka matoha
 robe hau'u Tirama ena pou namona kairoro aina,
 weiana Auba Robe ena barobe hiabunai rama
 haeai haukia hanona baibeni tabakiai kateao
 Tirama kea'i taeanakia.

¹⁷ Ua buonai Tirama ena aka nababaina
 hanona napa Keriso Iesu aonai.

¹⁸ Au 'abi haeai haeai a'i kahinanakia, ia 'abi ha-
 monamo kahinana, Keriso au ebaraina'u kairoro
 mai kaka rama haeai haukia herekiai kama-
 iainakia Tirama herena aiana kateka'aina hauna
 mo,

19 au e'u aka weiana aonai Auba robe hi-abunai hoa mai babai hiabukia tewaira tina. Weiana Ierusalem mai akakaiaro aeao mo Iluriko 'eka maikoina Keriso pouna namona airoroai orena.

20 Rani ikoinai e'u raona apa'uana hanona neiana, pou namona kairoro aina Keriso atana a'i te'iohina 'ekakiai. Weiana hanona hau ha ena hoboro ebakorina hauna ahanai e'u itu a'i mabakorina paunai.

21 Puka robenai tererena ihobona etibaha,
 “Pouna a'i teona haukia
 hanona kateihana, abomo aiana
 a'i teona haukia hanona
 kate'iohina.”

Isa 52.15

Paulo Eraonana Keao Roma.

22 Aka weiana ehore rani bo'okia eba'orona'u buonai, a'i awahi heremi.

23 'A bariu 'eka neianai e'u aka aba abaorenakia, abomo ihau bo'ona anuatae kawahi kaihanimi.

24 Ua buonai au nanuatae kakabanai Speini kaeao raninai kaihanimi, mai aonamo'u wai kipokia kahamiaho rani papana, murinai kato-baraina'u kaeao weia.

25 Ia au bariu Ierusalem naeao Tirama ena maearima weia temiaho haukia ibaraikia paunai.

26 Pokina Tirama ena marea maearimakia weiakia Makedonia mai Akaia hanokia haukia kipokia ekia nuataeai beruberu tabakia tebararo Tirama ena robe maearimakia Ierusalem teuraru haukia 'eukia.

27 Ia aka weiana tebabaina mai aonamokia. Ia ua tebabai aiho hanona ebero. Pokina Iuda haukia aubakia ena banamo rama haeai

haukia kipokia tewartena buonai rama haesai
 haukia hauani ena banamo tabakia baika Iuda
 haukia Keriso tia'ikakaumana haukia katebe-
 nokia hanona ebero.

²⁸ Aka neiana kabaorena, moni tebararona
 hauna kipo'u kaeaoaina Ierusalemaha haukia
 kabenakia murinai, kawahi kaihanimi ba Speini
 kaeao.

²⁹ Au na'ioibina, kawahi heremi raninai Keriso
 ena banamo maikoinai kawahi aina.

³⁰ Uaho'aba'u e, eka Obiapaka Iesu Keriso
 paunai abomo raona'au weiana Auba robe ebe-
 naka hauna paunai nanoinimi, emi bahuba'ari
 ai kipokia kahabahamomo Tirama katonoina au
 pau'u ai.

³¹ Emi bahuba'ari ai Tirama katonoina Iudea
 aonai Iesu Keriso a'i tia'ikakaumana haukia
 imakiai kebamaurina'u, abomo Tirama ena
 maearima weia Ierusalemahi temiaho haukia e'u
 aka neiana katea'i taeana mai aonamokia.

³² Uahomana raninai Tirama ena nuataeai
 kawahi heremi mai aonamo'u, abomo kipokia
 kahabatabura haeamonaka.

³³ Baibua nibaibeni Tiramana ikoimiai
 heremiai kemiaho. Amen.

16

Paulo Ena Banamo 'Abikia.

¹ Au wai naba'ioibinimi haibuka Foiibe niwahi,
 ia hanona Kenkrea aiara apa'uana Tirama ena
 marea ena aka* babi'ena ha.

² Nanoinimi Obiapaka atanai katoa'i taeana,
 ihobona Tirama ena robe maearimakia tua'i
 taeanakia 'abana, abomo ena nuatae akanai

* **16:1:** (1) *Diakono*

hanona katobaraina, pokina ia ehore maearima bo'ona ebarainakia, au abomo ebaraina'u.

³ E'u banamo Priskila mai Akula katobenakia, ia hanona au kipokia Keriso Iesu ena aka tababaina haukia.

⁴ Terarua au pau'uai ekia mauri a'i teraonana. Banamo 'abina nabenakia, aumo ikupaia'u aha'i, ia rama haeai haukia ekia Tirama ena marea haukia ikoikiai abomo banamo 'abina tebaibeni.

⁵ E'u banamo terarua ekia ituai tito'u haukia welakia Tirama ena marea haukia abomo katobenakia.

E'u banamo e'u raona'au hauna Epaineto katobena,

ia hanona Asia aonai hau kori'uaina ena mauri ebaibeni Keriso 'euna.

⁶ E'u banamo Maria katobena, ia hanona wai paumiai aka apa'uana ebabaina.

⁷ E'u banamo hatia'a'u Androniko mai Iunia katobenakia,

ia terarua mai au kipokia wapura itunai tamiaho. Iuhubeau haukia ia terarua te'iobi harainakia, ia hanona Keriso tea'ikakauma 'uaina ba au hanona muriai.

⁸ E'u banamo Ampilia katobena, Obiapaka aonai naraona'au aina.

⁹ Abomo e'u banamo Urebano katobena, taka haeamo Keriso aonai, e'u raona'au hauna Staku abomo e'u banamo katobena.

¹⁰ Abomo e'u banamo Apele katobena, ia hana atetua terama ranikiai ena a'ikakaumai ekori 'ini Keriso aonai.

E'u banamo Aristobulo ena itu haukia katobenakia.

¹¹ E'u banamo hatia'a'u Herodiona katobena,

e'u banamo Nakiso ena itu haukia katobenakia,
ia hanona Obiapaka aonai haukia.

¹² E'u banamo Trupena mai Truposa katobenakia,
ia hanona Obiapaka paunai aka tebabai harai
babi'ekia.

E'u banamo e'u raona'au babi'ena Peresi kato-
bena,
ia hanona Obiapaka aonai aka rarina 'akina
ebabaina.

¹³ E'u banamo Obiapaka etina'ana hauna Rufo
mai hinana ohi katobenakia,
ia hinana hanona au hina'u ai eao.

¹⁴ E'u banamo Asunukrito, Pilegon, Hereme,
Patroba, Herema mai kipokia temiaho
haeamo haukia katobenakia.

¹⁵ E'u banamo Pilologo, Iulia, Nerea haibuna
ohi abomo Olumupa mai Tirama ena robe
maearimakia ikoikiai ia kipokia temiaho
haeamo haukia katobenakia.

¹⁶ Ha ha baipau robenai kipomi katobanamoni.
imi.

Keriso ena marea maearimakia ikoikiai ekia ba-
namo tetiu ahina heremi.

Baraona 'Ini 'Abina Orena Ebenakia.

¹⁷ Uaho'aba'u e, nabahi ahinimi, hoa hore
abomo emi a'ikakauma tia'i ki'ana haukia mai
'iobi wei'ana toa'ina hauna ti'oatana haukia ka-
toiha 'ininakia, abomo herekiai katokapare.

¹⁸ Pokina maearima uahomakia haukia hanona
Keriso aika eka Obiapaka ena aka a'i tibabaina,
'a kipokia ekia nuatae akakia tibabai, ekia
'abi namokiai abomo bahao rea 'abi'abikiai
maearima weiakia ki'a herenai ekia 'iobi aha'i
haukia tibahao reanakia.

19 Wai pou namona aiana tuka'aina hanona maearima ikoikiai pouna aba teona, weiana buonai au hanona wai naonamo ainimi. Au nanuatae wai hanona taba namokia herekiai katoaotipa, ia taba ki'a obokia ibabaikiai a'i katoraonaña.

20 Baibua Tiramana kehore rani a'i kehoma'a Satani aba kehe amataina wai 'apumi ba'akiai. Au nabahuba'ari, aika eka Obiapaka Iesu ena aoko'o hoana heremiai kemiaho.

A'ikakauma Haukia Baika Ekia Banamo 'Abikia.

21 Timoteo, au tararua taka haeamo hauna mai hatia'a'u Luka, Iason, Sosipatro ekia banamo tetiu ahina heremi ai.

22 Au, Teretio, Paulo ehina 'abikia marere neianai arerenakia hau'u abo'umo Obiapaka atanai nabanamonimi.

23 Gaio ia herenai namiaho, neia ena ituai Tirama ena marea maearimamai tato'u haumai nibarainamai mai aonamomai tamiaho, ena banamo netiu ahina heremi, aiara apa'uana monina ne'imana hauna Erasto mai uaho'abaka Koato terarua ekia banamo abomo tetiu ahinakia heremi.

24 Au nabahuba'ari, eka Obiapaka Iesu Keriso ena aoko'o hoana hanona ikoimiai heremiai kemiaho. Amen.

Tirama Kahabanamona.

25 Tirama kahabanamona, ia hanona mai taburana kebakori 'ininimi emi a'ikakaumai, Iesu Keriso pouna namona nairoro aina hauna taearanai, mai 'abi tohana bunina 'uainai rani homa'ana tebunina hauna ebawaira tinana taearanai.

²⁶ 'A bariu 'abi tohana weiana hanona miaho banai banai Tiramana ena 'abiai mahabanai haukia ekia rere rere aonai ewaira tina, maearima ikoikiai 'abi tohana weiana teba'iobinakia, ua buonai hanopaka ikoikiai Tirama kate a'ikakaumana abomo aiana kateka'aina.

²⁷ Aobero Tiramana hamo hamona kahabana-mona Iesu Keriso paunai Ia nuabina kemiaho banai banai! Amen.

'Abi'uai Apa'uana Mahamahana
The New Testament in the Waima Language of Papua
New Guinea
Nupela Testamen long tokples Waima long Niugini

Copyright © 2002 Wycliffe Bible Translators, Inc.

Language: Waima

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-20

PDF generated using Haiola and XeLaTeX on 18 Apr 2025 from source files dated 31 Aug 2023

cec16783-6218-5812-9255-85478fb5e61c